

ԼԵՌՆԱՅԻՆ ՂԱՐԱՔԱՂԻ ՀԱՆՐԱՊԵՏՈՒԹՅԱՆ ԿՐԹՈՒԹՅԱՆ ԵՎ ԳԻՏՈՒԹՅԱՆ ՆԱԽԱՐԱՐ

Հ Ր Ա Մ Ա Ն

18 նոյեմբերի 2014 թ.

N223/Մ

ք.Ստեփանակերտ

ԼԵՌՆԱՅԻՆ ՂԱՐԱՔԱՂԻ ՀԱՆՐԱՊԵՏՈՒԹՅԱՆ «ՏԱՐՎԱ ԼԱՎԱԳՈՒՅՆ ՈՒՄԱՆՈՂ» ՀԱՆՐԱՊԵՏԱԿԱՆ ՄՐՑՈՒՅԹԻ ԱՆՑԿԱՑՄԱՆ ԿԱՐԳԸ ՀԱՍՏԱՏԵԼՈՒ ՄԱՍԻՆ

Լեռնային Ղարաբաղի Հանրապետության կառավարության 2007 թվականի հոկտեմբերի 24-ի N442-Ն որոշմամբ հաստատված Լեռնային Ղարաբաղի Հանրապետության կրթության և գիտության նախարարության կանոնադրության 13-րդ կետի ա) ենթակետին համապատասխան՝

ՀՐԱՄԱՅՈՒՄ ԵՄ՝

1. Հաստատել Լեռնային Ղարաբաղի Հանրապետության «Տարվա լավագույն ուսանող» հանրապետական մրցույթի անցկացման կարգը՝ համաձայն հավելվածի:
2. Սույն հրամանի կատարման հսկողությունը վերապահել Լեռնային Ղարաբաղի Հանրապետության կրթության և գիտության նախարարի տեղակալ Ա. Սարգսյանին:

ՆԱԽԱՐԱՐ՝

Ս. ԱՍՐՅԱՆ

Կ Ա Ր Գ
«ՏԱՐՎԱ ԼԱՎԱԳՈՒՅՆ ՈՒՍԱՆՈՂ» ՀԱՆՐԱՊԵՏԱԿԱՆ ՄՐՑՈՒՅԹԻ ԱՆՑԿԱՑՄԱՆ

1. ԸՆԴՀԱՆՈՒՐ ԴՐՈՒՅԹՆԵՐ

1) «Տարվա լավագույն ուսանող» հանրապետական մրցույթը (այսուհետ՝ Մրցույթ) կազմակերպում և անց է կացնում Լեռնային Ղարաբաղի Հանրապետության կրթության և գիտության նախարարությունը (այսուհետ՝ Նախարարություն):

2) Սույն կարգը որոշում է «Տարվա լավագույն ուսանող» հանրապետական մրցույթի նպատակը, խնդիրները, անցկացման կարգը և ժամկետները, ինչպես նաև թեկնածուների ընտրության չափանիշները:

2. ՄՐՑՈՒՅԹԻ ՆՊԱՏԱԿՆԵՐԸ

1) Բացահայտել Լեռնային Ղարաբաղի Հանրապետության պետական և հավատարմագրված ոչ պետական բարձրագույն ուսումնական հաստատությունների (այսուհետ՝ Բուհ) այն ուսանողներին, ովքեր ցուցաբերել են բարձր առաջադիմություն և իրենց առավել ակտիվ են դրսևորել գիտահետազոտական, ստեղծագործական, սպորտի և հասարակական կյանքի բնագավառներում:

2) Նպաստել ուսանողների առաջադիմության բարձրացմանը:

3. ՄՐՑՈՒՅԹԻ ԽՆԴԻՐՆԵՐԸ

1) Խթանել մրցակցությունը Լեռնային Ղարաբաղի Հանրապետության Բուհերի ուսանողների միջև:

2) Խրախուսել այն ուսանողներին, ովքեր ցուցաբերել են բարձր առաջադիմություն, ունեն նշանակալի ձեռքբերումներ գիտահետազոտական, ստեղծագործական և սպորտի բնագավառներում, ինչպես նաև ակտիվ գործունեություն են ծավալում հասարակական կյանքում:

4. ՄՐՑՈՒՅԹԻ ԱՆՑԿԱՑՄԱՆ ԿԱՐԳԸ

1) Մրցույթը անց է կացվում երկու փուլով.

ա) ներբուհական,

բ) հանրապետական:

2) Մրցույթը անց է կացվում՝ հիմք ընդունելով ներկայացված թեկնածուների ուսման առաջադիմությունը, մասնագիտական ձեռքբերումները և հասարակական ակտիվությունը:

3) Ներկայացված թեկնածուների ուսման առաջադիմությունը գնահատվում է 8-10 միավորներով.

ա) 8 միավորի կարող են հավակնել այն թեկնածուները, ովքեր բակալավրի կրթական ծրագրով արդյունքների ամփոփման դեպքում հաղթահարել են միջին որակական գնահատականի (այսուհետ՝ ՄՈԳ) հնարավոր առավելագույն արժեքի 85%-ը.

բ) 9 միավորի կարող են հավակնել այն թեկնածուները, ովքեր բակալավրի կրթական ծրագրով արդյունքների ամփոփման դեպքում հաղթահարել են ՄՈԳ-ի հնարավոր առավելագույն արժեքի 90%-ը:

գ) 10 միավորի կարող են հավակնել այն թեկնածուները, ովքեր բակալավրի կրթական ծրագրով արդյունքների ամփոփման դեպքում հաղթահարել են ՄՈԳ-ի հնարավոր առավելագույն արժեքի 95%-ը:

4) Ներկայացված թեկնածուների մասնագիտական ձեռքբերումները գնահատվում է 5-7 միավորներով.

ա) 5 միավորի կարող են հավակնել այն թեկնածուները, ովքեր մասնակցել են ներհամալսարանական գիտաժողովների, սեմինարների, ֆորումների (զեկուցումներ, հաղորդումներ, ելույթներ) կամ ունեն պատվոգրեր, զովասանագրեր, դիպլոմներ, կամ հանդիսանում են քաղաքային և ներբուհական ցուցահանդեսների կամ մրցույթների հաղթողներ:

բ) 6 միավորի կարող են հավակնել այն ուսանողները, ովքեր մասնակցել են հանրապետական գիտաժողովների, սեմինարների, ֆորումների (զեկուցումներ, հաղորդումներ, ելույթներ) կամ ունեն հրատարակված աշխատանքներ հանրապետական գիտական ամսագրերում կամ հանդիսանում են հանրապետական ցուցահանդեսների կամ մրցույթների հաղթողներ:

գ) 7 միավորի կարող են հավակնել այն թեկնածուները, ովքեր մասնակցել են, միջազգային գիտաժողովների, սեմինարների, ֆորումների (զեկուցումներ, հաղորդումներ, էլոյթներ) կամ ունեն հրատարակված աշխատանքներ միջազգային գիտական ամսագրերում կամ հանդիսանում են միջազգային ցուցահանդեսների կամ մրցույթների հաղթողներ:

5) Ներկայացված թեկնածուների հասարակական ակտիվությունը գնահատվում է 3-5 միավորներով.

ա) 3 միավորի կարող են հավակնել այն թեկնածուները, ովքեր անդամակցում են ներֆակուլտետային ուսանողական կառույցներին և ակտիվորեն ներգրավված են դրանց աշխատանքներում.

բ) 4 միավորի կարող են հավակնել այն թեկնածուները, ովքեր անդամակցում են ներհամալսարանական ուսանողական կառույցներին և ակտիվորեն ներգրավված են դրանց աշխատանքներում.

գ) 5 միավորի կարող են հավակնել այն թեկնածուները, ովքեր անդամակցում են հանրապետական երիտասարդական կառույցներին և ակտիվորեն ներգրավված են դրանց աշխատանքներում:

6) Մրցույթի անցկացման առաջին փուլը յուրաքանչյուր Բուհ անց է կացնում մինչև ընթացիկ տարվա նոյեմբերի 15-ը:

7) Առաջին փուլի հաղթողների փաստաթղթերը ուղարկվում են Նախարարության մրցութային հանձնաժողով մինչև ընթացիկ տարվա դեկտեմբերի 1-ը: Յուրաքանչյուր բարձրագույն ուսումնական հաստատություն ներկայացնում է 1 թեկնածու:

8) Մրցույթի անցկացման երկրորդ փուլը անց է կացնում Նախարարությունը մինչև ընթացիկ տարվա դեկտեմբերի 15-ը:

9) Մրցույթին մասնակցելու համար ներկայացվում են հետևյալ փաստաթղթերը.

ա) մասնակցության հայտ Բուհի կողմից՝ համաձայն Ձև 1-ի,

բ) քաղվածք բարձրագույն ուսումնական հաստատության ղեկավարի նիստի արձանագրությունից,

գ) ստուգման գրքույկի պատճեն և առաջադիմության թերթիկ,

դ) բնութագիր Բուհի կողմից՝ մրցույթի թեկնածուի հասարակական ակտիվության գնահատմամբ,

ե) հրապարակումների ցուցակ՝ ստորագրված Բուհի գիտքարտուղարի կողմից և հաստատված պրո-ռեկտորի կողմից, կամ ստեղծագործական, սպորտային մրցույթներում, օլիմպիադաներում մասնակցությունը հավաստող փաստաթղթեր:

10) Վիճելի հարցերի դեպքում մրցութային հանձնաժողով են ներկայացվում փաստաթղթերի բնօրինակները:

5. ՄՐՑՈՒԹԱՅԻՆ ՀԱՆՁՆԱԺՈՂՈՎ

1) Մրցույթի անցկացման 1-ին և 2-րդ փուլերի անցկացման համար ստեղծվում են մրցութային հանձնաժողովներ:

2) Առաջին փուլի մրցութային հանձնաժողովի կազմը հաստատում է Բուհի ղեկավարը:

3) Երկրորդ փուլի մրցութային հանձնաժողովի կազմը հաստատում է Նախարարը:

4) Մրցութային հանձնաժողովը հաստատում է իր գործունեության աշխատակարգը, որի համաձայն՝

ա) քննարկում է Մրցույթի անցկացման հետ կապված տեխնիկական և տեղեկատվական ապահովման հետ կապված հարցեր,

բ) անց է կացնում Մրցույթին ներկայացված փաստաթղթերի փորձաքննությունը,

գ) ամփոփում է Մրցույթի արդյունքները:

5) Հանձնաժողովի նիստը իրավագոր է, եթե դրան մասնակցում են անդամների կեսից ավելին:

6. ՄՐՑՈՒՅԹԻՆ ՄԱՍՆԱԿՑԵԼՈՒ ՊԱՅՄԱՆՆԵՐԸ

Մրցույթին իրավունք ունեն մասնակցելու Բուհերի բակալավրի առկա ուսուցման համակարգի 3-4-րդ կուրսերի ուսանողները:

7. ՄՐՑՈՒՅԹԻ ԱՐԴՅՈՒՆՔՆԵՐԻ ԱՄՓՈՓՈՒՄԸ

1) Մրցույթի հաղթողները որոշվում են մրցութային հանձնաժողովի նիստում՝ մրցութային բոլոր փաստաթղթերի ուսումնասիրության արդյունքների և հավաքած առավելագույն միավորների քանակի հիման վրա:

2) Մրցութային հանձնաժողովը վերջնական որոշումը կայացնում է բաց քվեարկությամբ: Հանձնաժողովի անդամների կարծիքները և առաջարկությունները ներառվում են մրցութային հանձնաժողովի արձանագրության մեջ:

3) Մրցութային հանձնաժողովը լիազոր է հանդիպել երկրորդ փուլ անցած բոլոր մասնակիցների հետ:

4) Անհրաժեշտության դեպքում մրցութային հանձնաժողովը կարող է մրցութի թեկնածուների հետ կազմակերպել հարցազրույցներ:

8. ՄՐԳՈՒՅԹԻ ՀԱՂԹՈՂՆԵՐԻ ՊԱՐԳԵՎԱՏՐՈՒՄԸ

1) Մրցութի հաղթողները պարգևատրվում են Նախարարության դիպլոմներով, ինչպես նաև՝ դրամական մրցանակներով:

2) Մրցութային հանձնաժողովի առաջարկությամբ և Նախարարի հրամանով կարող են հատուկ խրախուսական մրցանակներով պարգևատրվել այն ուսանողները, ովքեր չեն ճանաչվել հաղթող, սակայն ցուցաբերել են բարձր արդյունքներ ներքոհիշյալ որևէ անվանակարգում.

ա) ուսման առաջադիմություն,

բ) մասնագիտական ձեռքբերումներ,

գ) հասարակական ակտիվություն:

Հ Ա Յ Տ
«ՏԱՐԿԱ ԼԱՎԱԳՈՒՅՆ ՈՒՍԱՆՈՂ» ՀԱՆՐԱՊԵՏԱԿԱՆ ՄՐՑՈՒՅԹԻ ՄԱՍՆԱԿՑՈՒԹՅԱՆ

<p style="text-align: center;">Բարձրագույն ուսումնական հաստատության անվանումը, ֆակուլտետը, մասնագիտությունը, կուրսը</p>	
<p style="text-align: center;">Մասնակցի անունը, ազգանունը, հայրանունը</p>	
<p style="text-align: center;">Ծննդյան թիվը</p>	
<p style="text-align: center;">Հասցեն, հեռախոսը</p>	
<p style="text-align: center;">Կցվող փաստաթղթերի ցանկը</p>	